



東都事略卷第八

本紀八

神宗體元顯道帝德王功英文烈武欽仁聖孝皇帝
子也母曰宣仁聖烈皇后高氏以慶曆八年四月十日生于



濮安懿王之宮邸祥光照室初受率府副率遷率府率嘉祐
五年遷右千牛衛將軍英宗入繼大統拜安州觀察使封安

國公加同中書門下平章事忠武軍節度使封淮陽郡王治平元
年進封穎王四年春正月丁巳英宗崩奉遺制即皇帝位

于匱前尊皇太后曰太皇太后皇后曰皇太后戊午大赦

天下丙寅吳奎樞密副使戊辰韓琦以司空兼侍中皇弟顥封

昌王顧樂安郡王二月詔曰朕常侍先帝左右恭聞德音

以本朝舊制士大夫之子有尚帝女者輒皆升行以避舅姑

之尊習行既久義甚无謂豈可以富貴之故屈人倫長幼之序也自今宜革之三月壬申歐陽脩罷癸酉吳奎參知政事閏月庚子 詔求直言夏六月辛未 詔曰農天下之本也 祖宗以來務加惠養比下寬恤之令賜蠲復之恩然而歷年于茲未極富盛間因水旱頗致流庸深惟其故殆州郡差役仍重勞逸不均喜為浮冗之名不急之務以奪其時而害其財故也其令逐路轉運司下州縣如官吏有差役利害可以寬減者實封條析以聞秋八月己巳京師地震癸酉葬 憲文肅武宣孝皇帝于永厚陵九月辛卯 皇弟顥封岐王顯高密郡王辛丑韓琦及吳奎陳升之罷呂公弼樞密使張方平趙抃並參知政事韓絳邵亢樞密副使癸卯郭逵罷冬十月己酉張方平以父憂罷癸酉种諤率兵取綏州戊寅 詔百官轉對

熙寧元年春正月甲戌朔日有食之改元丙申趙槩罷唐介參知政事秋七月癸酉 詔謀殺已傷案問欲舉自首從謀殺減二等論已卯陳升之知樞密院事羣臣上尊號曰 奉元憲道文武仁孝皇帝司馬光入直因言上尊號非先王令典願 陛下推而不居 上用光言不許遂終身不受尊號甲申京師地震乙酉又震是夕月有食之辛卯京師地再震八月甲辰京師地震甲子 詔封 太祖之後為王九月辛未封從式安定郡王冬十一月丁亥合祭 天地于圜丘大赦天下十二月庚申造神臂弓辛酉邵亢罷

二年春二月己亥富弼同中書門下平章事庚子王安石參知政事甲子陳升之王安石同制置三司條例三月乙酉 詔曰朕以為欲致治於天下者必富之而後可今縣官之費不給而

民財大屈故特詔輔臣置司於內以革其大弊夫事顯於所習則能明乎得失之原今將權天下之財而資之於有司能習知其事者焉則其所得必精所言必通聚而求足固足以成吾富民之術若夫苛刻之論務欲朘削於下而斂怨於上者斯亦朕之不取宜令三司判官諸路監司及內外官限受詔後兩月各具財用利害聞奏夏四月甲辰 詔曰方夏大旱麥將槁朕惟災變之來蓋不虛發豈朕政令未孚聽納靡中以致厥咎与其罷同天節上壽公卿大夫其勉脩厥職以圖脩復丁未唐介薨丙辰 詔曰傳曰近臣盡規以其榮耻与上同也今此在位者視朕過失与朝廷政事之闕默而不言乃或私議竊歎若以其責不在己夫豈皆習見成俗以為當然其以有含章懷寶待倡而發者也今百度 弛風俗偷墮薄惡災異譴告不一此誠忠

賢助朕憂惕以初制改法救弊除患之時宜令侍從官自今視朕過失與朝廷政事之闕無有巨細各具章極言無隱噫言善而不用朕有厥咎道之而不言爾為不恭朕將用此攷察在位所以事君之實而明黜陟焉丁巳遣使八人相度農田水利稅賦科率徭役利害五月壬辰 太皇太后遷居慶壽宮冬十月丙申富弼罷陳升之同中書門下平章事十一月韓絳同制置三司條例甲戌 詔裁宗室授官法唯 宣祖 太祖 太宗之子擇其後一人為公世世不絕其餘元孫之子將軍以下聽出外官袒免之子更不賜名授官許令應舉初呂夷簡在 仁宗時改宗室補環衛官驟增廩給其後費大而不可止至韓琦為相嘗議更之而不果 上即位遂行之閏月壬子置諸路提舉常平廣惠倉行青苗法應郡縣每歲春秋未熟據民等第以

常平及廣惠倉錢斂散取息

三年春正月 詔諸路常平廣惠倉給散青苗錢本以惠卹貧乏並取民情願今慮官吏不體此意追呼均配抑勤翻成騷擾其令諸路提點刑獄官體量覺察違者立以名聞敢沮抑願請者按罰亦如之二月壬申司馬光樞密副使光辭三月己亥廷試進士始用策夏四月己卯趙抃罷韓絳參知政事五月罷條例司壬子罷入閣戊午新作來遠驛六月丁丑宗室承亮等襲封秋七月壬辰呂公弼罷馮京樞密副使九月夏人寇慶州乙未韓絳宣撫陝西庚子曾公亮罷辛丑馮京參知政事吳充樞密副使冬十月夏人寇環慶戊寅陳升之以母憂罷十一月韓絳為陝西河東宣撫使十二月乙丑行保甲法于諸路丁卯韓絳王安石並同中書門下平章事王珪參知政事

四年春二月丁巳朔罷貢舉詞賦科以經術取士壬申 皇弟頽封嘉王夏人犯延州慶州軍亂三月丁未韓絳罷夏五月己亥月有食之司農寺以免役法頒天下秋九月辛卯大享 明堂大赦天下夏國主秉常請綏州冬十一月丙申月有食之增廣太學置三舍

五年春二月丙寅蔡挺樞密副使三月丙午京師置市易務夏六月乙亥置武學冬十月王韶收復鎮洮軍十二月壬午陳升之樞密使

六年春正月辛亥 詔奉 僖祖神主為 太廟始祖二月丙申克河州遂復洮岷疊宕等州夏四月甲戌朔日有食之己亥文彥博罷冬十月章惇開梅山十二月癸未 詔在京納免行錢旱

七年春正月乙卯皇子俊封永國公二月甲申吐蕃青宜結鬼
章圍河州景思立與戰于踏白城死之三月丙午王韶軍寧河
解河州圍己酉木征降丙辰遼主遣蕭禧來言薊應朔三州地
界命韓績報聘又命劉忱蕭士元呂大忠同商量地界于代州
乙丑詔曰朕涉道日淺晦于致治致失厥中以干陰陽之和
乃冬迄春早曠為虐四海之內被災者廣間詔有司損常膳避
正殿與以塞責消變歷日滋久未蒙休應嗷嗷下民大命近止
中夜以興震惕靡寧永惟其咎未知攸出意者朕之聽納不得
於理與獄訟非其情與賦斂失其節與忠謀讜言鬱於上聞而
阿諛壅蔽以成其私者衆與何嘉氣之久不效也應中外文武
臣僚並許實封直言朝政闕失朕將親覽攷求其當以輔政理
三事大夫其務悉心交儆成朕志焉夏四月己巳上以久旱

見輔臣嗟嘆懇惻王安石曰水旱常數堯湯所不免陛下即
位以來累年豐稔今早曠雖遠但當修益人事以應天災耳
上曰朕所以恐懼如此者正為人事有所未脩也辛未頒方田
制度丙戌王安石罷韓絳同中書門下平章事呂惠卿參知政
事己丑詔曰朕嘉先王之法澤於當時而傳於後世可謂盛矣
故夙興夜寐八年于茲度時之宜造為法令布之四方皆稽合
先王參攷羣策而斷自朕志已行之效固已可見士大夫其務
奉承之以稱朕意遼主遣蕭素梁穎來辛亥罷制科秋九月蔡
挺請置三十七將河北十七府界七京東十京西三冬十月己
未合祭天地于圜丘大赦天下王韶樞密副使
八年春正月庚子蔡挺馮京罷二月丙寅皇子儻封景國公癸
酉王安石同中書門下平章事三月庚子遼主再遣蕭禧來命

韓縝乘驛會議癸丑命沈括使于遼夏四月戊寅吳充樞密使
庚寅廢沙苑監閏月己未陳升之罷壬子宗室世居反伏誅秋
八月戊戌韓絳罷冬十月庚戌呂惠卿罷丁酉慧出輜己亥
詔求直言壬寅大赦天下十二月壬寅元絳參知政事曾孝寬
僉書樞密院事乙巳皇子儻薨交趾陷欽廉白三州辛亥命趙
鼎李憲討之尋罷憲以郭達為宣撫使而鼎副之

九年春正月庚辰交趾陷邕州守臣蘇緘死之秋八月壬辰
詔司農寺罷粥鬻天下祠廟冬十月丙午王安石罷吳充王珪並
同中書門下平章事馮京知樞密院事十二月甲午遣內侍李
憲措置邊事

十年春二月己亥王韶罷丙午交趾李乾德納款夏五月廖恩
叛于南劍州秋七月己亥廖恩降冬十月癸巳 詔濮安懿王

諸子襲封濮國王奉祠事後承襲遍即傳長孫庚子皇子俊薨
十一月甲戌合祭 天地于圜丘大赦天下十二月壬午 詔

改元丁亥 皇第六子封均國公价建國公

元豐元年春正月庚申月有食之閏月壬辰孫固同知樞密院
事己亥曾孝寬以父憂罷秋九月乙酉呂公著薛向並同知樞
密院事冬十月丁未重脩都城畢工興役凡三年十二月壬子
皇子价薨置大理獄

二年春瀘州蠻乞弟反以韓存寶討之三月庚辰以內侍宋用
臣導洛通汴夏五月庚辰 詔曰 濮安懿王 先帝斟酌典
禮即園立廟 詔王子孫歲時奉祀義叶恩稱後世無得議焉
今三夫人名位或未正瑩域或異處有司置而不講曷足以彰
先帝甚盛之德仰承在天之志乎三夫人可並稱曰王夫人命

主司擇歲月遷祔 濮園甲申元絳罷戊子蔡確參知政事六月清汴成冬十月庚戌赦天下乙卯 太皇太后曹氏崩十二月乙巳 詔酌周官賓興之意立太學三舍選察升補之法三年春二月丙午章惇參知政事三月乙丑吳充罷癸酉葬慈聖光獻皇后于永昭陵秋七月甲戌 詔曰朕惟皇以道帝以德王以業各因時制名用配其實何必加崇稱號以自飭哉秦漢以來尊天子曰皇帝其亦至矣朕承 祖宗之休宅士民之上凡虛文繁禮悉已革去而近司羣辟猶或時以稱號見請雖出於歸美報上之忠然非朕所以若稽先王之意自今每遇大禮罷上尊號癸未琴出西方丙戌 詔曰乃孟秋癸未琴出西方朕甚懼焉其令中外臣僚並許直言朝政闕失朕虛心以改丁亥 詔曰孝莫大於嚴父嚴父莫大於配天而屬有尊親

之殊禮有隆殺之別故遠而尊者祖則祀於郊之園丘而配天迺而親者禰則祀於國之明堂而配上帝園丘祀天則對越諸神明堂則上帝而已故其所配如此然後足以適尊親遠近之義其將來祀 英宗皇帝於明堂惟以配上帝餘從祀羣臣悉罷八月乙巳 詔曰朕嘉成周以事建官以爵制祿小大詳要莫不有叙分職率屬而萬事條理 國家受命百年而官政尚愧前聞參酌損益趨時之宜使臺省寺監之官實典職事領空名者一切罷去而易之以階因以制祿凡厥恩數悉如舊章中書具奏九月乙亥初行官制辛巳大享 明堂用新樂大赦天下癸未薛向孫固並改樞密副使丙戌皇弟顥封雍王顥曹王馮京樞密使薛向罷丁亥呂公著改副使冬十月甲戌月有食之十一月乙丑朔日有食之

四年春正月改五路義勇爲保甲辛亥馮京罷孫固知樞密院事韓縝同知院事三月癸卯章惇罷甲辰張璪參知政事夏四月种諤言夏人害其主秉常議討之遣內侍王中立節制鄜延內侍李憲節制環慶涇原高遵裕以環慶之師劉昌祚以涇源之師种諤以鄜延之師問罪夏人辛未月有食之五月庚子皇子侂薨秋七月癸卯斬韓存寶于軍更命林廣將存寶兵平乞弟九月乙酉復蘭州冬諸將之師至靈州城下敗績十二月詔班師林廣與乞弟戰敗之

五年春正月林廣追逐乞弟至歸涿州二月癸巳還師夏四月壬子日有食之癸丑更官制以王珪爲尚書左僕射兼門下侍郎蔡確尚書右僕射兼中書侍郎章惇門下侍郎張璪改中書侍郎蒲宗孟尚書左丞王安禮尚書右丞丁丑呂公著罷六月

丙辰 詔自今事不以大小並中書省取旨門下省覆奏尚書省施行三省同得旨更不帶三省字行出是日輔臣有言中書省獨取旨事躰太重 上曰三省躰均中書省揆而議之門下省審而覆之尚書省承而行之苟有不論自可論奏不當緣此以亂躰制也秋八月壬子 皇第六子封延安郡王九月甲戌城永樂夏人來攻戊戌城陷徐禧李稷李舜舉死之冬十一月乙酉奉安 祖宗神御于景靈宮大赦天下

六年春正月丁丑朔新王輅毀夏閏六月乙亥朔夏國主秉常納款壬辰皇子佖封儀國公庚子加上 仁宗 英宗尊謚秋七月丙辰孫固罷韓縝知樞密院事安燾同知院事八月丁亥月有食之辛卯蒲宗孟罷王安禮尚書左丞李清臣尚書右丞冬十月夏國主秉常遣使來甲戌 皇第十一子封寧國公十

一月丙午祭昊天上帝于圜丘大赦天下

七年春三月丁巳皇子延安郡王侍宴于集英殿秋七月甲寅王安礼罷八月己丑皇子侯封成国公冬十一月庚午皇子似封和国公

八年春正月戊戌皇帝不豫甲辰大赦天下三月甲午朔

皇太后垂簾立皇子延安郡王為皇太子乙未大赦天下戊戌皇帝崩于福寧殿聖壽三十八殯于殿之西階羣臣上尊謚曰英文烈武聖孝皇帝廟号神宗冬十月乙酉葬永裕陵紹聖二年加上尊謚曰紹天法古運億建功欽仁皇帝崇寧三年再加上尊謚曰紹天法古運德建功英文烈武欽仁聖孝皇帝政和三年改上尊謚曰躬元顯道帝德王功英文烈武欽仁聖孝皇帝

臣稱曰宋自建隆迄于治平百年之間四聖相授深仁厚澤浹于人心者至矣承平日久事多舒緩神宗皇帝乃慨然圖又立政造事以新一代之治於是廣親親之道以睦九族尊經術之士以作人材施力役以便民通貨財而阜國時散薄斂以行補助之政嚴脩保伍以為先事之防具水土之利而厚農桑分南北之祀而侑祖祢酌六典以正百辟制九軍而攘四夷凡所制作欲以遠迹治古可謂厲精之王矣雖然銳于始者其終必悔神宗末年蓋亦悔矣而臣下不能將順其意此後日繼述之論所由起也

東都事略卷第九

本紀九

哲宗憲元繼道顯德定功欽文睿武齊聖昭孝皇帝 神宗第

六子也母曰

欽成皇后朱氏以熙寧九年十二月七日生赤

光照室十年授天平軍節度使封均國公元豐五年改鎮彰武
封延安郡王七年 神宗宴百官于集英殿 哲宗初侍立于

朝 天表粹溫進止中度宰臣王珪稱賀 神宗曰皇家慶事

與卿等同之令 皇子與珪等相見珪等再拜稱謝八年春

神宗寢疾彌留二月癸未王珪奏言去冬常奉聖訓 皇子

延安郡王來春出閣願蚤建東宮又奏請皇太后權同聽政

神宗首肯越明日三月甲午朔 皇太后垂簾於福寧殿是日

立 哲宗為皇太子戊戌 神宗崩奉 遺制即 皇帝位于

匱前尊 皇太后曰太皇太后 皇后曰皇太后 德妃朱氏
為皇太妃已亥大赦天下皇叔顥封揚王顥荆王 皇弟封遂
寧郡王泌大寧郡王僕咸寧郡王似普寧郡王夏四月辛未
詔寬保甲養馬年甲罷免行錢五月乙未 詔求直言庚戌王
珪薨戊午蔡確尚書左僕射兼門下侍郎韓縝尚書右僕射兼
中書侍郎章惇知樞密院事司馬光門下侍郎六月丁亥 詔
曰朕紹承燕謀獲奉 宗廟初攬庶政鬱于大道夙夜祇畏不
敢皇寧懼無以章 先帝之休烈而安輯天下之民永惟古之
王者御政之始必明目達聰以防雍蔽敷求讜言以輔不逮然
後物情徧以上聞利澤得以下究詩不云乎訪予落止此成王
所以求助而羣臣所以進戒上下交儆以遂文武之助朕甚慕
焉應中外臣寮及民庶並許實封直言朝廷闕失民間疾苦在

京於登聞檢鼓院投進在外於所屬州軍驛置以聞朕將親覽
以攷其中而施行之秋七月戊戌呂公著尚書左丞罷保甲八
月丙子月有食之既冬十月乙酉葬 英文烈武聖孝皇帝于
永裕陵丙戌罷方田

元祐元年春正月庚寅朔改元丙戌 太皇太后詔曰原廟之
立所從來久矣前日 神宗皇帝初即祠宮並建寢殿以崇嚴
祖考其孝可謂至矣今 神宗既已升祔於故事當營館御以
奉神靈而宮垣之東密接民里欲加開展則懼成煩擾欲採摺
紳之議皆合帝后為一殿則慮無以稱 神宗欽奉 祖考之
意聞治隆殿後有園池以后殿推 本留以待未亡人也可即
其地立 神宗原廟吾萬歲之後當從 英宗皇帝於治隆上
以寧神明中以成 吾子之志下以安民之心不亦善乎二月

乙丑罷雇役丁卯 詔內外待制太中大夫以上各舉監司二人閏月庚寅察確罷司馬光尚書左僕射兼門下侍郎壬辰呂公著門下侍郎丙午李清臣尚書左丞呂大防尚書右丞辛亥章惇罷乙卯范純仁同知樞密院事夏四月己丑韓縝罷壬寅呂公著尚書右僕射兼中書侍郎文彥博以太師平章軍國重事五月丁巳朔韓維門下侍郎秋七月辛酉 詔以十科舉士八月辛卯罷俵青苗壬辰皇弟偲封祁國公九月丙辰朔司馬光薨辛酉大亨 明堂大赦天下己卯張璪罷冬十月戊午呂大防中書侍郎劉摯尚書右丞以浮屠安強葭蘆米脂四砮歸于夏人

二年春三月丁巳 太皇太后詔曰祥禫既終典策告具而有司遵用 章獻明肅皇后故事予常受冊於文德殿雖 皇帝

盡孝愛之意務極尊崇而朝廷有損益之文各從宜稱仰惟

章獻明肅皇后輔佐 真廟擁佑 仁宗茂業豐功宜見隆異

顧予涼薄絕企徽音稽用舊儀實有慙德所有將來受冊可止

就崇政殿 太皇太后諭執政曰母后臨朝非國家盛事文德

殿天子正牙豈女主所當御哉夏四月旱辛卯 詔曰朕承

祖宗之休獲紹大統而涉道日淺昧于致治萬事失中以干陰

陽之和乃自冬迄夏旱暘為虐四方之內被災者廣生民嗷嗷

無所告勞永為災變之來蓋不虛發意者朕之聽納不得於理

與功罪失當而賦稅無節與民力屈竭而土木不息與抑忠言

壅於上聞而德澤不下流與何大異之滋至也非克己思過洗

心脩德其何以荅塞天變協至大和可自今避正殿減常膳公

卿大夫其勉脩厥職共圖消復己亥 太皇太后詔曰有司奏

受冊當依典故在從吉之後夫冊典備物以致隆名國之盛禮也行於和平之日懼不克稱况今早曠為虐苗稼將槁民則何罪咎實在予雖側躬永思損膳自戒尚慮無以塞責消變而有司乃於此時欲以隆名盛禮加我是實予之不德所有將來受冊禮宜權停罷丁未 詔曰 祖宗設六科之選策三道之要以網羅天下賢雋 先皇帝興學校崇經術以作新人材變天下之俗故科目之設有所未 今天下之士多通於經術而不知所學矣宜復制策之科以徠拔俗之材裨于治道蓋乃帝王之道損益趣時不必盡同同歸于治而已今復置賢良方正能直言極諫科自今年為始西蕃酋鬼章犯南川砦遂城洮州遣游師雄行邊五月丁亥李清臣罷劉摯尚書左丞王存尚書右丞六月辛丑安燾知樞密院事秋七月辛未韓維罷八月游師雄

以种誼入洮州擒鬼章青宜結以獻

三年夏四月辛巳呂公著以司空平章軍國事呂大防尚書左僕射兼門下侍郎范純仁尚書右僕射兼中書侍郎孫固門下侍郎劉摯中書侍郎王存尚書左丞胡宗愈尚書右丞趙瞻僉書樞密院事六月夏人寇邊荆王頤薨秋七月癸丑 太皇太后詔有司褒崇 皇太妃討論典故以聞夏人寇邊八月皇叔顥封徐王冬閏十二月甲辰 詔百官觀新樂甲寅 太皇太后詔曰官冗之患所從來尚矣流弊之極實萃于今以闕計負至相倍蓰上有久閑失職之吏則下有受害無告之民故命大臣攷求其本苟非裁損入流之數無以澄清取士之原吾今自以眇身率先天下永惟臨御之始嘗敕有司蔭補私親舊無定限自惟薄德敢配前人已詔家庭之恩止從母后之比今當又

損以示必行夫以先帝顧託之深天下責望之重苟有利於社稷吾無愛於髮膚矧此恩私實同豪末忠義之士當識此誠各忘內顧之口共成節約之制今後每遇聖節大禮生辰合得親屬恩澤並四分減一皇太后皇太妃准此

四年春二月甲辰呂公著薨三月己卯胡宗愈罷夏五月甲申月有食之六月甲辰范純仁王存罷丙午韓忠彥尚書左丞許將尚書右丞趙瞻同知樞密院事秋七月庚辰安燾以母憂罷九月辛巳大亨明堂大赦天下冬十一月癸未孫固知樞密院事劉摯門下侍郎傅堯俞中書侍郎

五年春二月庚戌又彥博致仕三月丙寅朔趙瞻薨壬申韓忠彥同知樞密院事蘇頌尚書左丞夏四月丙午孫固薨自去冬不雨至于五月丁亥始雨冬十二月辛卯朔許將罷

六年春二月辛卯劉摯尚書右僕射兼中書侍郎王巖叟僉書樞密院事癸巳蘇轍尚書右丞秋上清儲祥宮成冬十月庚午幸太學十一月乙酉朔劉摯罷辛丑傅堯俞薨

七年夏四月己未立皇太后孟氏甲子詔皇后具六禮五月戊戌御文德殿發冊以呂大防為奉迎使六月辛酉蘇頌尚書右僕射兼中書侍郎蘇轍門下侍郎韓忠彥知樞密院事范百祿中書侍郎梁燾尚書左丞鄭雍尚書右丞劉奉世僉書樞密院事王巖叟罷秋九月壬辰太皇太后謂輔臣曰郊祀依

仁宗先帝故事呂大防蘇轍蘇頌以天地合祭為是范百祿以元豐六年南郊分祀上帝配以太祖未可輕改大防等議以皇帝即位未嘗親祀天地合行合祭之禮為有名遂降詔曰國家郊廟時祀祖宗以來命官攝事惟三歲一親

郊則饗清廟冬至合祭天地于圜丘元豐間有司援周制以合祭不應古義先帝詔定親祠北郊之儀未之及行是歲郊不設皇地示位而宗廟之饗率如權制朕以涼昧嗣承六聖休德鴻緒今茲禋禮奠幣上帝裸鬯廟室而地示天神久未親祀矧朕方郊見天地之始其冬至南郊宜依熙寧十年故事設皇地示位以嚴並况之報冬十一月癸巳合祭天地于圜丘大赦天下

八年春三月甲申蘇頌罷辛卯范百祿罷夏四月癸丑詔曰方夏暑時動植之類皆以遂其長養而吾民觸禁抵法繫縛圜圉其深文之吏或不能體朕欽恤之意因循延蔓久不為決干陰陽之和非細故也其詔天下官師之長若時令哀矜庶獄以丕應朕志丁巳詔曰朕惟祖宗嚴奉郊廟每以三歲對

越二儀先帝元豐之末方丘特祭之儀蓋將補一代之闕容振百王之墜典朕以菲德嗣守丕基列聖已行謹當遵奉先朝未舉懼不克堪理既不疑事无可議今後南郊合祭天地依元祐七年例施行六月戊午梁燾罷秋七月丙子朔范純仁尚書右僕射兼中書侍郎八月辛酉太皇太后不豫戊辰大赦天下九月戊寅太皇太后高氏崩于壽康殿是月皇帝親政

紹聖元年春二月丁未李清臣中書侍郎鄧潤甫尚書右丞鄭雍尚書左丞已酉葬宣仁聖烈皇后于永厚陵三月壬申朔日有食之乙亥呂大防罷戊子皇叔顥封冀王丁酉蘇轍罷夏四月癸丑改元壬戌章惇尚書左僕射兼門下侍郎范純仁罷閏月癸酉詔罷十科奉士甲申安燾門下侍郎五月甲辰詔

進士專治經術辛亥劉奉世罷乙丑鄧潤甫薨丁卯復免役保
甲法六月癸未曾布同知樞密院事貶責元祐臣寮秋九月庚
戌罷制科冬十二月甲午貶責元祐史官范祖禹趙彥若黃庭
堅

二年春三月加上 神宗尊謚夏四月庚午 詔恤刑獄秋九
月辛亥大享 明堂大赦天下冬十月甲子鄭雍罷甲戌許將
尚書左丞蔡卞尚書右丞辛巳皇叔顥封楚王十一月乙未安
燾罷

三年春正月庚子韓忠彥罷二月夏人犯邊戊子 詔罷合祭
自令間因大祀之歲以夏至之日躬祭地祇于北郊三月辛亥
皇弟佖封申王 皇弟封端王六月夏人寇邊秋七月癸卯月
有食之九月折可適與夏人戰于雞鞞嶺敗之己酉滁州沂江

地震壬子楚王顥薨乙卯 皇后孟氏廢居瑤華宮冬十月夏
人犯邊

四年春正月庚戌李清臣罷二月章惇言司馬光等已追貶而
呂大防劉摯梁燾等亦宜量罪示罰凡三十七人皆貶甲子文
彥博降太子少保閏月壬寅曾布知樞密院事林希同知院事
許將中書侍郎蔡卞尚書左丞黃履尚書右丞夏六月癸未朔
日有食之秋八月己酉彗出西方九月壬子 詔曰彗出西方
災譴為大朕甚懼焉公卿各宜悉心脩政輔朕不德仍許中外
臣僚直言朝政闕失朕將親覽乙卯大赦天下

元符元年春三月戊午殺內侍陳衍乙丑咸陽民段義獻玉室
甲戌皇弟佖封莘王似簡王偲永寧郡王夏四月壬辰林希罷
五月戊申朔 皇帝授傅國寶呂惠卿帥師破夏人于大沙堆

六月戊寅朔改元冬十一月甲子祀昊天上帝于圜丘大赦天下

二年春三月遼國遣蕭德崇來夏四月癸巳皇弟德封睦王五月癸亥進策西安城于天都山六月詔親祀北郊並依南郊儀制秋八月皇子生赦天下丁酉王瞻招納青唐王子瞻征九月庚子朔夏國遣使來丁未以賢妃劉氏立為皇后閏月收復青唐以瞻征隴拶等來歸辛巳黃履罷乙未白皇子薨

三年春正月戊寅大赦天下已卯皇帝崩于福寧殿聖壽二十五年殯于殿之西階羣臣上尊謚曰欽文睿武昭孝皇帝廟號哲宗七月壬寅葬永泰陵宗寧三年加上尊謚曰憲元繼道世惠揚功欽文睿武齊聖昭孝皇帝政和三年改上尊謚曰憲元繼道顯德定功欽文睿武齊聖昭孝皇帝

臣稱曰哲宗皇帝爰自冲年嗣膺大歷是時宣仁共政登進忠賢以安天下故元祐致治之盛庶幾仁宗及紹聖親政起熙豐舊人而用之元祐政事一切務以相反為虐哲宗之英毅開敏有能致之資惜乎大臣不以忠厚而事其上也

東都事略卷之九

東都事略卷第十

本紀十

徽宗體神合道駿烈遜功聖文仁德憲慈顯孝皇帝 神宗第十一子也母曰 欽成皇后陳氏以元豐五年十月十日生

后就館之月陰雨彌旬既誕天氣澄霽六年授鎮寧軍節度使封寧國公八年封遂寧郡王紹聖三年拜平江鎮江軍節度使封端王元符三年春正月己卯 哲宗崩 皇太后坐福寧殿東垂簾謂宰臣章惇等曰皇帝已棄天下惇等哭 皇太后曰皇帝無子天下事須早定惇獨厲聲曰當立同母弟 皇太后曰 神宗諸子申王長而有目疾次即 端王當立惇曰以年則申王長當立以禮律則母弟簡王當立 皇太后曰俱是神宗子豈容分別當立 端王惇等唯唯承命 王入即皇帝

位于福寧殿奉遺制 皇太后權同處分軍國事庚辰大赦
天下癸未追冊 貴儀陳氏爲皇太妃丙戌皇兄祔封陳王戊
子皇弟侯封衛王似蔡王僖定王二月丁未立 皇后王氏庚
申韓忠彥門下侍郎黃履尚書右丞三月太史言四月朔日當
食庚寅 詔曰太史前告天將動威日有食之期在正陽之月
變異甚鉅殆不虛生夙夜以思未燭厥理將以彌綸初政消弭
天菑自非藥石之規孰開朕聽况今周行之內人有所懷芻蕘
之中言皆可采凡朕躬之闕失若左右之忠邪政令之否臧風
俗之媿惡朝廷之德澤有不下究閭閻之疾苦有不上聞咸聽
直言毋有忌諱夏四月丁酉朔日有食之甲辰韓忠彥尚書右
僕射兼中書侍郎李清臣門下侍郎蔣之奇同知樞密院事庚
戌 皇長子生辛亥大赦天下五月癸酉 皇太后詔曰 瑤

華廢后累經大需其位號禮數令三省樞密院詳議以聞丙子
廢后孟氏復爲元祐皇后 皇后劉氏爲元符皇后乙酉蔡
卞罷秋七月丙寅朔 皇太后歸政癸酉赦天下八月壬寅葬
欽文睿武昭孝皇帝于永泰陵丁未 詔曰朕恭惟 仁宗皇
帝躬天地之度以仁治天下授 英宗以神器之重措宗社於
泰山之安功隆德厚孰可擬議 神宗皇帝以聖神不世出之
資慨然大有爲於天下規模宏遠凜凜乎三代之風而廟祏之
制未及尊崇之典闕孰甚焉其令禮官攷定 仁祖 神考廟
制詳議以聞庚戌禮官言 二宗之廟請如 聖詔永祀不祧
與天無極 詔恭依建景靈西宮九月庚午 皇長子封韓國
公辛未章惇罷冬十月丁酉韓忠彥尚書左僕射兼門下侍郎
壬寅曾布尚書右僕射兼中書侍郎己未 詔曰神考以天縱

之聖厲精治道內脩法度外闢境土新代之典則以遺我後人而往者任事之臣用心或過朕所不取朕於為政取人無彼時此時之間斟酌可否舉措損益惟時之宜旌別忠邪用捨進退惟義所在使政事不失其當人材各得其所則能事畢矣無偏無黨正直是與常用中以與天下休息以成朕繼志述事之美咨爾中外服我訓誡 十一月庚午 詔改元戊寅安燾知樞密院事庚辰黃履罷辛卯范純禮尚書右丞十二月戊申赦天下是歲以涅廓鄯三州歸于青唐

建中靖國元年春正月壬戌朔有赤氣起東北彌亘西方甲戌皇太后向氏崩于慈寧殿夏四月辛卯朔日有食之 五月丙寅葬 欽聖憲肅皇后于永裕陵 欽慈皇后陳氏改祔裕陵六月庚寅朔 皇長子封京兆郡王戊午范純禮罷秋七月

丙戌安燾罷丁亥蔣之奇知樞密院事陸佃尚書右丞章綬同知樞密院事九月趙諗反于渝州冬十月乙未李清臣罷十一月庚申陸佃尚書左丞溫益尚書右丞庚申祀 昊天上帝于圜丘大赦天下 詔改元

崇寧元年春正月河東地震二月戊戌趙諗伏誅庚子 皇子煥封魏國公辛丑 皇太妃朱氏薨夏五月庚申韓忠彥罷戊辰 欽成皇后祔葬裕陵己卯陸佃罷庚辰許將門下侍郎溫益中書侍郎蔡京尚書左丞趙挺之尚書右丞閏六月壬戌曾布罷秋七月戊子蔡京尚書右僕射兼中書侍郎甲午都省置講議司庚子章綬罷八月辛未開封府置居養院甲戌蔡京請天下並置孝養士做太孝三舍為攷選升補之法己卯趙挺之尚書左丞張商英尚書右丞建辟雍外孝冬十月癸亥蔣之奇

罷蔡卞知樞密院事甲戌 元祐皇后復居瑤華宮十一月乙酉溪洞徽州并誠州納土甲辰 詔曰元符 下詔求直言蓋欲廣朕聞見裨益政治比以所上章疏付之有司攷其邪正合具名來上其間忠言讜議指陳闕失力陳父子兄弟繼述友恭之義者四十一人悉令旌擢以勸多士內有附會姦慝誣毀先帝政事總五百四十一人然言有淺深罪有輕重取其詆譏謗斥尤甚者三十人可逐之遠方次等四十一人其言亦多詆訛各逐等第責降以戒為臣之不忠者戊申 皇子楷封高密郡王

二年春正月乙未辰沅溪洞納土壬寅溫益薨丁未蔡京尚書左僕射兼門下侍郎二月甲寅以 元符皇后劉氏為太后居崇恩宮甲子蔡京以陝西鑄大銅錢當十夾錫錢當二夏四月

己巳大赦天下戊寅趙挺之中書侍郎張商英尚書左丞吳居厚尚書右丞安惇同知樞密院事五月己亥皇子楫封楚國公秋七月戊寅朔青唐來納土八月戊申張商英罷九月庚寅

詔曰 本朝 僖祖至 仁宗始備七世當 英宗祔廟上祧

順祖暨 神考祔廟又祧 翼祖則 哲宗祔廟 父子相承

當為一世祧遷之序典禮可稽令禮官詳議聞奏其後禮官言

當祧 宣祖甲辰 詔曰自京師至于郡縣春秋祈報徧于天

下者唯社稷為然今守令不深惟其故以是為不急之祀壇壝

不修民得畜牧種藝於其間春秋行事取其臨時乃或器用弗

備粢盛弗蠲齋戒弛懈裸獻失度甚不副朕稱秩祀典之意其

令監司巡歷所至察不如儀者

三年春正月戊子 詔江池饒建州鑄當十大錢二月丁未州

縣置漏澤園壬子 皇子楫封南陽郡王三月丁亥倣周官司
園之法令諸州築園土以居強盜貧死者晝則役作夜則拘之
視罪之輕重以為久近之限許出園土充軍無過者縱釋之辛
丑大內災夏四月辛酉皇子楫封樂安郡王乙丑罷講議司王
厚復青唐五月癸酉樂安郡王楫薨丙申 詔曰乃者有司以
哲宗嗣承 神考父子相繼自當為世故上祧 宣祖惟我
祖考功隆德大萬世不祧者今已 五宗則 七廟當祧者
二宗而已遷毀之禮近及 祖考殆非先王尊祖奉先之意其
議奏六月丙午 詔諸路州軍未置學處並置學養士壬子置
筭學丁巳籍元祐姦黨以司馬光為首凡三百九人刻石于文
德殿門之東壁秋七月上 神宗 哲宗尊謚八月丙午許將
罷九月乙亥趙挺之門下侍郎吳居厚中書侍郎張康國尚書

左丞鄧洵武尚書右丞皇子樞封吳國公癸巳建 九廟冬十
月夏人寇涇原巳巳 詔已祧 翼祖 宣祖廟並復十一月
甲戌幸太學辟雍丙戌皇子杞封翼國公丁亥 詔曰昔 神
考嘗議以三舍取士而罷州郡科卒之令其法始於畿甸而未
及行於郡國 朕纂圖制詔有司講議其方成書來上悉推行
之設辟雍於國郊以待士之升貢者其詔天下除將來科場如
故事外並罷州郡發解及省試法其取士並繇學校升貢丙申
祀 昊天上帝于圜丘大赦天下十二月戊午安惇薨

四年春正月丙戌 詔於帝為鼎宮立大角鼎星祠丙申蔡卞罷
二月己酉置三衛府甲寅張康國知樞密院事劉逵同知院事
何執中尚書左丞乙卯頒方田法于天下閏月趙懷德降三月
甲辰趙挺之尚書右僕射兼中書侍郎戊午復銀州丁卯祥柯

夜郎納土夏五月乙丑 詔曰民為邦本本固邦寧天下承平日久民既庶矣而養生送死尚未能無憾朕甚憫焉今鰥寡孤獨既有居養之法若疾而無醫則為之置安濟坊貧而不葬則為之置漏澤園朕之志於民深矣監司守令奉行毋忽六月丙子興復解池監寶戍子趙挺之罷秋七月丁巳京畿四面置鋪屏衛京師八月九鼎成甲申奉安九鼎戊子 詔即因丙巳之地建明堂辛卯 詔曰道形而下先王體之協於度數播於聲詩其樂與天地同流雅頌不作久矣去聖逾遠遺聲弗存迺者得隱逸之士於草茅之賤獲英莖之器於受命之邦適時之宜以身為度鑄鼎以起律因律以制器按協於庭八音克諧祖宗積累之休上帝克相豈朕之德哉昔堯有大章舜有大韶三代之王亦各異名今追千載而成一代之制宜賜名曰大晟朕將薦郊廟享鬼神和萬邦與天下共之豈不美與其舊樂勿用時蔡京用魏漢津鑄鼎作樂漢津取尚書身為度之義以上年二十四當四六之數取上中指以為黃鍾之寸而生度量權衡以作樂而京為緣飾之 詔陝西置蕃季九月己亥大赦天下 詔元祐黨人徙移近地惟不得至四輔畿甸乙巳 詔曰三時務農一時講武先王之政也應京畿三路保甲並於農隙時教閱冬十月壬辰日有黑子十二月乙亥 詔大司成攷德行道藝歲貢之

五年春正月庚子彗出西方甲辰吳居厚門下侍郎劉達中書侍郎乙巳 詔曰乃孟春之夕星文變見朕甚懼焉應中外臣僚並許直言朝政闕失朕虛心以改以銷乾象之變 詔元祐元符係籍黨人朝堂及外處石刻並令除毀丁未大赦天下罷

方田壬子罷園土二月丙寅蔡京罷趙挺之尚書右僕射兼中書侍郎三月丙辰蔡王似薨夏五月辛亥皇子柎封魯國公秋七月壬寅 詔改元冬十月壬戌 詔曰有天下者尊事上帝救命惟幾敢有弗虔而釋氏之教階營佛事妄以天帝次於鬼神之列瀆神踰分莫此之甚其能克享上帝之心乎有司其除削之以稱朕嚴恭寅畏之意十一月辛卯陳王似薨十二月己未劉達罷

大觀元年春正月戊子朔大赦天下置議禮局于尚書省甲午蔡京尚書左僕射兼門下侍郎壬寅吳居厚罷壬子何執中中書侍郎鄧洵武尚書左丞梁子美尚書右丞丁巳 詔曰古之學者三年通一經十有五年則五經皆通熙寧中迪士以經術今已三十餘年士益習矣自今學生願兼他經者聽量立陞進

之法使天下全材異能得以進焉三月丁酉趙挺之罷何執中門下侍郎鄧洵武中書侍郎梁子美尚書左丞朱諤尚書右丞甲寅 詔以八行取士夏五月己丑皇子柎封楊國公張懷素以吳儲吳侔謀反伏誅庚寅鄧洵武罷甲午頒新樂六月己未梁子美中書侍郎乙亥朱諤薨秋八月丁巳皇弟似封魏王僖鄧王 皇第九子封蜀國公己未上 僖祖徽號曰 僖祖立道肇基積德起功懿文憲武睿和至孝皇帝庚申徐處仁尚書右丞林攄同知樞密院事九月辛亥大亨 明堂大赦天下冬十月辛酉蘇州地震癸亥大雨雹徐處仁以母憂罷閏月丙戌林攄尚書左丞鄭居中同知樞密院事十一月壬戌 詔曰朕承 祖宗休烈萬邦作享典章文物於斯為盛永惟受命之符當有一代之制而尚循秦六璽之用度越百年之久或未大備

自天申命地不愛寶獲金玉於異土得好工於編氓八寶既成
復無前比殆天所授非人能為顧何德以承之哉夫制而用之
存乎其人天人相因自然之理足以繼志 烈考而傳之萬世
可以來年正月朔旦御大慶殿恭受八寶

二年春正月壬子朔 皇帝受八寶大赦天下庚申皇弟侯封
燕王僖越王 皇長子封定王楷嘉王樞建安郡王杞文安郡
王栩安康郡王棫濟陽郡王 皇第九子封廣平郡王丙子以
內侍童貫為武康軍節度使三月甲子皇子材封魏國公乙亥
皇子模封鎮國公黃河清夏五月庚戌朔日有食之乙丑洮州
溪哥城王子臧征僕哥降六月乙酉涪州夷族納土秋八月丙
申梁子美罷九月辛亥林攄中書侍郎余深尚書左丞壬申皇
子植封吳國公癸酉 皇后王氏崩冬十一月辛酉訪求古禮

器壬戌 詔討論臣庶祭禮癸亥 詔曰禮當追述三代之意
適今之宜開元禮不足為法令親制冠禮公革付議禮局餘五
禮令視此編次十二月壬辰葬 靖和皇后于裕陵之次

三年春正月丁卯夷州納土己巳胡 西道蠻納土二月丙子
朔播州納土三月壬申張康國薨夏四月戊寅林攄罷癸巳鄭
居中知樞密院事管師仁同知院事癸卯余深中書侍郎薛昂
尚書左丞劉正夫尚書右丞六月甲戌朔管師仁罷丁丑蔡京
以太師罷辛巳何執中尚書左僕射兼門下侍郎秋八月乙酉
皇子朴封雍國公九月皇子棣封徐國公江淮大旱自六月不
雨至于冬十月十二月 詔東南罷鑄夾錫錢

四年春二月己丑余深門下侍郎張商英中書侍郎侯蒙同知
樞密院事丁酉罷河東河北京東鑄夾錫錢夏五月丁未彗出

奎婁戊午大赦天下余深罷六月乙亥張商英尚書右僕射兼
中書侍郎丙申薛昂罷秋七月戊申皇子樛封異國公八月乙
亥劉正夫中書侍郎侯蒙尚書左丞鄧洵仁尚書右丞庚辰吳
居厚門下侍郎閏月己酉 詔太廟親祠不用大牲九月丙寅
朔日有食之冬十月丁酉立 貴妃鄭氏為皇后鄭居中罷庚
申吳居厚知樞密院事十一月丁卯祀 昊天上帝于園丘大
赦天下 詔改元十二月罷內藏東北出剩鹽鈔及六路 上
供錢鈔

東都事略卷第十

東都事略卷第十一

本紀十一

政和元年春正月戊寅皇子樛封定國公三月癸酉王襄同知
樞密院事夏淮南旱五月戊辰 詔以當十錢當三秋八月丁
巳張商英罷九月戊寅王襄罷以童貫使于遼丁亥皇子栻封
廣國公冬十月辛卯 詔曰朕奉承 聖考任賢使能惟恐弗
及用事之臣弗迪訓告乘高執而為邪附下周上陰害紹述姦
跡既露猶復怙終朕甚羞之朕於士大夫矜以節行厲以廉耻
寵以高爵厚祿可謂無負矣其有險詖躁競朋黨比周朕則放
棄戮辱焉布告列位咸諭朕意十一月癸亥 詔曰毀傷支體
有害風教况夷人之法中華豈可效之監司宜禁止丙子皇子
樛封福國公

二年春正月童貫使還以其叛臣馬植來歸易姓名曰李良嗣
夏四月己丑 詔縣令勸課癸卯 詔曰古者井天下之田而
衣食足 神考方天下之田以正經界庶乎復古矣今續而成
之以紹先烈焉其復方田五月皇子椿封慶國公己巳蔡京以
太師楚國公三日一至都堂議事六月己丑余深門下侍郎秋
七月甲子 詔曰親親仁也今宗族蕃衍盛大其置敦宗院於
兩京以養宗室九月癸未 詔曰前代以僕臣充宰相之任六
卿為 公之官昔我 神考有志改為或未遑暇朕適追來孝
若昔大猷稽三代公孤之名攷左輔右弼之號是正名實惟古
之師官不必備而惟其人祇于新書克祇厥服以成 烈考之
志宜以太師太傅太保為三公少師少傅少保為三孤以左輔
右弼太宰少宰易侍中中書令左右僕射之名舊以太尉司徒

司空為三公及尚書置令並罷又 詔太尉古官舊掌武事雖
循秦漢為 公之任名稱已久可改為武選一品之位存節度
使之上其儀物班序居執政之次冬十月戊子獲元圭於民間
蔡京以為天錫禹者十一月戊寅 皇帝受元圭於大慶殿大赦
天下辛巳何執中改少傅太宰兼門下侍郎十二月辛亥皇子
樞封衛國公是歲定國公拱薨

三年春正月甲子 詔曰朕荷天之休錫以元圭告成厥功推
原本始實自我 烈考施張彌綸權輿萬事以克用又亦惟我
哲宗繼志述事克篤前烈顧朕何德以堪 不可

告可差官冊告永裕

法度之意 哲宗遵制

居厚罷鄭居中知樞密院事

崇恩太后崩三月壬子朔日有食之夏四月

鄧洵仁罷己酉薛昂尚書右丞閏月丙辰 詔曰周於詩雅姬雖周姓攷古立制宜莫

可改公主為帝姬郡主為宗姬縣主為族姬其稱大者可並依舊仍以媿名二字易其國號兩國者以四字庚午慶國公椿薨五月丙午 昭懷皇后祔葬泰陵己酉以大晟樂班之天下其舊樂悉禁秋七月己亥貴妃劉氏薨九月創方澤以祀地祇冬十一月壬寅祀 昊天上帝于圜丘大赦天下增上 神宗徽號改定 哲宗尊謚戎州夷人納土十二月保州納土

四年春二月 皇長子行冠禮于文德殿夏五月丙戌始祭地祇于方澤赦天下霸州納土冬十一月丁丑皇子槿封相國公

五年春正月夷卜漏犯瀘州二月乙巳立 皇長子定王為皇太子甲寅大赦天下夏六月孟昌齡鑿大徑作三山橋秋七月戊辰朔日有食之丁丑 詔建明堂丁亥皇子機封陳國公槪封瀛國公冬十一月丙戌皇子槩封惠國公十二月戊午趙適擒卜漏是歲遼人與女真交攻遼人大敗

六年春二月童貫僉書樞密院事宣撫陝西河東河北三月辛丑茂州夷人納土夏四月辛未何執中以太傅致仕己丑罷夾錫錢庚寅 詔蔡京三日一朝仍赴都堂及輪往逐省治事辛卯上 玉皇尊號曰 太上開天執符御歷含真體道昊天玉皇上帝童貫以种師道之師大敗夏人於臧底河成德軍五月庚子鄭居中太宰兼門下侍郎劉正夫少宰兼中書侍郎壬寅鄧洵武知樞密院事秋七月庚子 詔曰朕嗣 先帝盛德大

法成令具吏習而民安之休祥荐臻四方蒙福生齒日衆本支蕃衍蠻夷納土開疆寔廣興事造功制禮作樂四方之遠人材之衆倍蓰於前遠矣挾姦罔上者於太平豐亨豫大之時欲爲五季變亂裁損之計朕若稽古訓審而後行而施之罔極豈有改作蓋害成之人敢行私智爲臣不忠罪莫大此可令御史臺覺察糾奏荆湖蠻寇攻沅州八月癸亥詔邊臣曰北虜不道結讐女真南北生靈皆朕赤子凡百舉措當務持重違者朕不汝貸已巳侯蒙中書侍郎薛昂尚書左丞九月辛卯朔上昊天尊號寶冊丙申大赦天下冬十一月己亥祀昊天上帝于圜壇大赦天下庚子白時中尚書右丞辛丑魏國公材薨癸卯上后土徽號曰承天效法厚德光大后土皇地祇皇子樞封鄆國公十二月乙酉劉正夫致仕遼王延禧與女真戰大敗

而潰邪律淳自立於燕

七年春正月召道士林靈素于温州築通真宮以處之癸丑

皇帝崇尚道教號教王道君皇帝二月辛未改天下天寧觀

爲神霄玉清萬壽宮無觀者以寺充仍設長生大帝君青華大

帝君像建寶籙宮三月乙未童貫權領樞密院事夏五月辛丑

祭地祇于方澤赦天下六月明堂成秋七月庚子詔八

寶增定命寶自今以九寶爲稱八月鄭居中以母憂罷九月宗祀于明堂大赦天下冬十月乙卯朔御明堂平朔左个以

是月天運致治布告于天下自是月朔布政孟冬頒歷率推攷氣運具之文辭以爲常戊寅侯蒙罷十一月鄭居中起復余深少宰兼中書侍郎白時中中書侍郎十二月丁巳薛昂門下侍郎庚午童貫領樞密院事

重和元年春正月甲申朔 皇帝受定命寶戊子皇孫諶封崇國公己丑大赦天下庚戌王黼尚書左丞童貫帥師與夏人戰于割牛城我師敗績熙河帥劉法死之二月庚午遣馬政由海道聘女真夏五月壬午朔日有食之六月癸酉夏人納款秋七月壽山良嶽成八月庚午建道學癸酉皇子椅封嘉國公九月辛巳 宗祀明堂自是歲以為常庚寅薛昂罷白時中門下侍郎王黼中書侍郎馮熙載尚書左丞范致虛尚書右丞辛丑鄭居中罷閏月丁卯皇子楷封郟王丙子 詔曰昔我 藝祖受禪于周嘉祐中擇柴氏一人封崇義公而三恪之封不及禮蓋未盡除崇義公依舊外擇柴氏最長見存者為周恭帝後以其世監周陵廟與知縣請給以示繼絕之仁為國三恪冬十一月己酉朔大赦天下改元丙子 詔服鞞改用履

宣和元年春正月壬子皇子樞封肅王杞景王乙卯詔改佛為大覺金仙餘為仙人道士僧稱德士尼為女德士寺為宮院為觀禁銅鈸塔像佛賜天尊服德士依道流戴冠丁巳女真遣使者來余深太宰兼門下侍郎王黼少宰兼中書侍郎癸酉皇子棟封溫國公二月庚辰 詔行籍田改元三月己未馮熙載中書侍郎范致虛尚書左丞張邦昌尚書右丞京師大水是月皇后親蠶夏四月丙子朔日有食之癸巳禁邊將以陳亡為逃亡者秋八月丁酉神霄宮成九月乙卯范致虛以母憂罷冬十一月乙卯祀 昊天上帝于園壇大赦天下放林靈素歸于溫州戊辰張邦昌尚書左丞王安中尚書右丞是歲金人攻遼國陷其東京黃龍府

二年春正月甲子罷道學二月乙亥趙良嗣王瓌聘金國夏五

月甲子祭地祇于方澤六月戊寅蔡京致仕乙酉罷方田秋
七月皇子穗封英國公九月壬寅金國遣錫速曷魯等來乙巳
詔復佛號德士復為僧丙辰以馬政聘金國冬十月戊辰朔日
有食之睦州方臘陷睦婺杭歙等州十一月己亥余深罷庚戌
王黼太宰兼門下侍郎十一月丁亥以童貫譚稹討方臘己丑
鄭居中權領樞密院事

三年春正月壬寅鄧洵武薨戊午皇子相封濟王模樂安郡王
二月丁卯罷淮南兩浙福建等路計置華石詔罷辟雍癸巳
大赦天下方臘陷楚州淮南盜宋江犯淮陽軍又犯京東河北
入楚海州夏四月丙寅貴妃劉氏薨庚寅童貫以其將辛興宗
與方臘戰于青溪擒之五月丙申宋江就擒戊戌鄭居中領樞
密院事蝗閏月置應奉司秋七月戊子童貫俘方臘以獻八月

丙辰方臘伏誅冬十一月丁丑馮熙載罷張邦昌中書侍郎王
安中尚書左丞李邦彥尚書右丞辛巳皇子桐封儀國公十二
月壬子皇子棧封益王皇第九子封康王模祁王羣盜悉平
四年春正月金國遣使來約夾攻遼國丁丑以童貫宣撫陝西
河東河北時金人已破中京遼主延禧遁上以三策付貫如燕
人悅而從之因以復舊疆上也如耶律淳納土稱藩中也如燕
民未悅服按兵巡邊全師而還下也二月丙午皇子植封信安
郡王三月辛酉幸太學夏四月以童貫為河北河東路宣撫使
蔡攸副之丙午詔求遺書于天下五月丁卯皇子柄封昌國
公童貫以楊可世之師與遼人戰于涿州之新城敗績种師道
進軍白溝為夔葛不所襲詔班師六月耶律淳死其妻蕭氏
納款秋八月辛亥遼國郭藥師以涿易二州來降九月己未金

國遣使姑且烏歇高慶裔來冬十二月庚午祀昊天上帝于園壇大赦天下十二月戊子趙良嗣周武仲使于金國壬寅皇子植封莘王

五年春正月王安中爲河北燕山路宣撫使二月乙酉李邦彥尚書左丞趙野尚書右丞皇子朴封華原郡王棣高平郡王三月乙卯金國遣寧木割王度刺撒盧母來命盧益趙良嗣馬擴聘之夏四月庚子童貫蔡攸帥師入燕山庚戌赦河北河東燕山路詔燕京改爲燕山府趙良嗣等得金國誓書以燕京六州來歸至是撫定五月庚申王黼爲太傅楚國公平州張覺以其地來降癸酉祭地祇于方澤六月戊申鄭居中薨辛亥蔡攸領樞密院事秋七月己未童貫致仕庚子羣臣上尊號曰繼天興道駿文神武睿聖皇帝上不許八月辛丑遼國四軍變离不率

師犯景薊與王師遇敗之于峯山冬十二月戊申皇子朴封儀王棣封徐王

六年春正月奚人殺夔离不傳首于我詔曰朕誕膺帝命克紹先猷取亂侮亡恢復境土施大澤於燕雲間舊俗來歸如水就下獨僞四軍大王夔离不悖衆逆命前年首犯王師於白溝繼復旅拒燕城旋命偏師敗於廣陽之北乃敢干天之紀擅即偏位去年輒寇景薊罪不容誅爰飭六師大敗於峯山隻輪不返甲辰傳首京師惟予克相上帝以遏亂畧皇天助順宗祏垂休有此駿功朕敢專享可擇日奏告宗廟二月丁亥皇子樗封河間郡王己亥親耕籍田閏三月辛巳皇后親蠶夏四月己酉陳橋顯烈宮成丁巳李邦彥以父憂起復六月起燕雲免夫錢於逐路郡縣守吏往往以軍法誅民河北盜起秋八月

乙卯童貫落致仕領樞密院事陝西河北河東燕山府路宣撫使金人以我之納張覺也欲敗盟故復用貫壬戌大赦天下九月乙亥白時中太宰兼門下侍郎李邦彥少宰兼中書侍郎丁亥趙野尚書左丞宇文粹中尚書右丞蔡懋同知樞密院事金人來取張覺傳首與之冬十二月丙子王黼致仕丙戌詔尚書省置講議司十二月癸亥蔡京落致仕領三省事是歲金人擒遼主延禧于夾山遼亡

七年春正月癸酉朔 詔告諭河北河東盜賊唐鄧汝穎流移人戶方春田桑宜使復業言念良民皆吾赤子比緣用非其人政失厥中不能撫御安集使飢寒流離扶老携幼動以萬計轉而為盜非其本心為之惻然其赦厥罪仍放宣和六年未納稅租監司州縣奉行毋忽乙亥 詔曰往者壹綱不振植黨交私

耳目之寄夫何賴焉朕今廣開言路爾其各揚乃職毋憚大吏毋徇私交毋伺大臣風旨以為鄉背務公好惡振紀綱以副朕意二月己巳皇子棡封南康郡王榛平陽郡王三月丙戌皇子槩封建安郡王夏四月庚申蔡京致仕戊辰 詔曰坐而論道於燕閒者三公之事作而相與推行者宰輔丞弼之職今居三公論道之位而總理三省衆務使宰輔丞弼殊成備負殊失所以紹述憲章之意可於尚書省復置令虛而不除三公止係階官更不總領三省若曰佐王論道經緯國事則三公其任焉三省並依元豐成憲毋復侵紊五月壬午皇子樅封潤國公壬辰詔曰有司凡有侵漁蠹耗之事理宜裁抑應不急之務無名之費令講議司條具以聞六月乙巳童貫封廣陽郡王秋七月庚午朔禁士庶名字有犯天王君聖及主字者甲戌皇子栲封沂

王八月罷講議司冬十一月丙戌祀 吳天上帝于圜壇大赦
天下金人分道入寇幹離不寇燕山黏罕寇河東踰石嶺關兩
酋會于河北遂以兵向京師十一月罷應奉司戊午 皇太子
除開封牧 詔曰朕獲承 祖宗休德託于士民之上二紀于
茲雖兢兢業存于中心而過咎形于天下蓋以寡昧之資藉盈成
之業言路壅蔽道諛日聞恩倖持權貪穢食得志搢紳賢能陷於
黨籍政事興廢拘於紀年賦歛竭生民之財代役困軍伍之力
多作無益侈靡成風利源辜摧已盡而牟利者尚肆誅求諸軍
衣糧不時而冗食者坐享富貴災異謫見而朕不悟眾庶怨懟
而朕不知追惟已愆悔之何及已下信詔大革弊端仍命輔臣
蠲除害政凡茲引咎興自朕躬庶以少謝天下譴怒之心保全
祖宗艱難之業慨念前此數有詔旨如下令以求直言脩政以

應天變行之未久奪于權臣乃復歸咎建議臣僚使號令不信
士氣沮傷今日所行質諸天地後復更易何以有邦况當今急
務在通下情不諱切直之言兼收勇智之士思得奇策庶能解
紛望四海勤王之師宣二邊禦敵之略永念 累聖仁厚之德
涵養天下百年之餘豈無四方忠義之人來徇國家一日之急
應天下方鎮郡邑守令各率師募眾勤王捍邊能立奇功者並
優加異獎不限常制草澤之中懷抱異材能為國家建大計定
大業或出 使疆外者並不次任使其尤異者以將相待之中外
臣僚士庶並許實封直言極諫於登聞檢院通進司投進朕當
親覽雖有失當亦不加罪咨尔萬方體予至意庚申 皇帝遜
位于 皇太子辛酉 皇太子即位尊 皇帝曰 道君太上
皇帝居龍德宮 皇后曰道君太上皇后靖康二年二月丁卯

道君皇帝出郊三月丁巳 道君皇帝北狩紹興五年四月乙未 道君皇帝崩 聖壽五十四 謚曰聖文仁德顯孝皇帝 廟號 徽宗十二年八月乙丑歸殯于龍德宮十月丙寅葬永祐陵丙午加上尊謚曰 體神合道駿烈遜功聖文仁德憲慈顯孝皇帝

臣稱曰元符末命 欽聖定策以立 徽宗起范純仁于謫中 欲任以相事而純仁以病不能造 朝烏虆純仁不得相 徽宗于初政此治亂之所以分也 夫忠臣進則朝廷尊 羣陰用則 既亂作 徽宗既已悟矣 於是改過不吝 以彰信兆民 遜位于子 以克謹天戒 雖 二駕遠狩而 大業復興有以也 夫

東都事略卷第十一

東都事略卷第十二

本紀十二

欽宗恭文順德仁孝皇帝

徽宗長子也 母曰

顯恭皇后 王

氏 以元符三年四月己酉生于坤寧殿時

徽宗甫登位 即生

嫡長 欲異其禮 越三日辛亥 大赦授山南東道節度使 封韓國

公 建中靖國元年 改鎮興德 封京兆郡王 崇寧二年 拜司空 移

鎮武昌 封定王 三年 拜太保 五年 立為皇太子 宣和七年 金人

入寇 除開封牧

徽宗內禮 以十二月辛酉 即

皇帝位于垂

拱殿

徽宗出居龍德宮 吳敏門下侍郎王忬 大赦天下 立

皇太子妃朱氏為皇后 甲子 黏罕圍太原 耿南仲 僉書樞密院

事 金人陷信德府 丙戌 上 道君皇帝尊號曰 教主道君太

上皇帝

母皇后曰

道君太上皇后

詔改元

靖康元年春正月丁卯朔 詔求直言戊辰金人犯濟州內侍
梁方平以其兵遁大將何灌亦望風潰金人遂度河己巳 詔
親征吳敏知樞密院事 道君皇帝東幸庚午李綱尚書右丞
宇文粹中扈從東幸綱建議城守罷親征以綱為行營使辛未
白時中罷李邦彥太宰兼門下侍郎張邦昌少宰兼中書侍郎
趙野門下侍郎王孝迪中書侍郎蔡懋尚書左丞金人逼京師
癸酉韓侂不軍至城下遣李枕鄭望之使于軍前金人移壁開
遠門唐恪同知樞密院事蔡懋為京城四壁守禦使金人攻通
天景陽門又攻陳橋封丘衛州等門大將何灌死之丙子 皇
弟康王使虜營庚寅張邦昌從 康王詣虜營辛巳 道君皇
帝至鎮江府路允迪僉書樞密院事大風吹沙皇子諶封大寧
郡王乙酉路允迪使河東黏罕軍丁亥种師道姚平仲兵至闕

下以師道同知樞密院事京畿河東北路宣撫使四方勤王並
隸之己丑种師道與金人戰于板橋敗之癸巳大霧四塞二月
李枕鄭望之至虜營虜先遣枕歸是夜姚平仲率步騎萬人劫
虜砦以敗還李綱罷庚子金人求 上母弟為質辛丑以宇文
虛中王休使韓侂不軍齎割三鎮詔書以往太學生伏闕上書
擅殺內臣于闕下李綱復為尚書右丞金人遣王訥隨宇文虛
中來報聘金人攻咸豐門癸卯皇弟肅王樞使韓侂不軍蔡懋
罷徐處仁中書侍郎宇文虛中僉書樞密院事乙巳以宇文虛
中王休再使韓侂不軍是日 康王還自虜營丙午罷明堂頒
朔布政丁未金人退師戊申大赦天下 詔曰自今庶事並遵
用 祖宗舊制選用大臣裁抑內侍不崇飾恩倖不聽任姦人
不輕爵祿不濫賜予不奪爾居以營燕遊之地不竭爾力以廣

浮用之費凡蠹國害民之事一切寢罷咨爾有衆明聽朕言庚戌李邦彥罷張邦昌太宰兼門下侍郎吳敏少宰兼中書侍郎李綱知樞密院事耿南仲尚書左丞李棨尚書右丞辛亥宇文粹中罷癸丑种師道罷黏罕兵次高平甲寅童貫蔡攸貶貫仍致仕金人陷隆德府守臣張確死之辛亥斬梁方平于都市遣王雲曹瑁使幹离不軍王孝迪罷三月戊辰李棨罷己巳張邦昌罷徐處仁太宰兼門下侍郎唐恪中書侍郎何臬尚書右丞許翰同知樞密院事庚子宇文虛中罷命趙野蔡攸奉迎道君皇帝辛巳道君皇帝至南京壬午詔曰朕承道君皇帝付託之重即位十有四日金人之師已及都城大臣建言捐金帛割土地可以紓禍賴宗廟之靈守備弗缺久乃退師而金人要盟終弗可保今肅王度河北去未還黏罕深入南陷隆

德又所過殘破州縣掠士女朕夙夜追咎何痛如之己詔元主和議李邦彥及奉使許地之人悉行罷黜又詔种師道姚古种師中往援三鎮朕惟祖宗之地尺寸不可與人且保塞陵寢所在誓當固守不忍陷三鎮二十州之民以媮頃刻之安與民同心永保疆土播告中外使知朕意癸卯命李綱迎道君皇帝于南京辛卯李綱自南京還夏四月丁酉朔立大寧郡王諶爲皇太子戊戌夏人寇震威城己亥道君皇帝至自南京入居龍德宮癸卯耿南仲門下侍郎戊申置詳議司于尚書省己酉趙野罷壬子幹离不遣賈寔冉企來甲寅以种師道爲河北河東宣撫使戊午皇弟棧封和王榛信王癸亥誅趙良嗣五月庚午寒如深冬甲戌赦河北丁丑种師中與金人戰于榆次死之甲申罷詳議司六月戊戌李綱爲河北河東宣撫使

辛丑以劉鞏為副使壬寅 皇弟握封安康郡王楫廣平郡王
詔曰朕既詔三省樞密院並依 祖宗舊法而羣臣庶士亦當
講孔孟之正道察安石舊說之不當者壬戌彗出紫微垣秋七月
辛卯誅童貫勝提軍叛犯濮州韓世忠討平之八月辛丑 詔
以彗見條其疾苦俾官吏除苛解饒異名和氣折可求與金人
戰敗績退保汾州甲辰以宗澤使幹島不軍李若水使黏罕軍
已未徐處仁吳敏罷唐恪少宰兼中書侍郎何臬中書侍郎陳
過庭尚書右丞許翰罷聶昌同知樞密院事李回僉書樞密院
事九月丙寅黏罕陷太原府帥張孝純為金人所執戊寅李綱
罷分天下為四道置四帥帶都總管北京帥總北道西京帥總
西道南京帥總東道鄧州帥總南道冬十月丁酉金人陷真定
府戊戌金人遣楊天吉王訥來欲割三鎮要尊號車輅等 朝

廷以帝號車輅及三鎮稅數遣王雲同訥行庚子陷汾州守臣
張克戩死之丁未馮澥知樞密院事壬子 皇弟康王使幹島
不軍以王寓為尚書左丞副之寓辭行賁以馮澥代之丙辰金
人犯平陽府澤州十一月丙寅夏人陷懷德軍守臣劉銓通判
杜翊世死之戊辰 康王還馮澥罷王雲還言虜必欲得三鎮
庚午 詔河東河北京畿清野甲戌金人度河乙亥命 皇弟
康王再使幹島不軍王雲副之京師戒嚴丁丑何臬罷陳過庭
中書侍郎孫傅尚書右丞庚辰 康王至相州辛巳命聶昌領
守禦使壬午 康王次磁州磁人殺王雲 康王回相州命耿
南仲使幹島不軍聶昌使黏罕軍甲申孫傅同知樞密院事曹
輔僉書樞密院事乙酉幹島不軍至城下丁亥李回罷金人攻
通津門楊天吉等再來己丑張叔夜以南道勤王之師到 闕

庚寅 皇帝幸東壁勞軍何臬門下侍郎閏月壬辰 皇帝幸西壁唐恪罷改太宰少宰復為左右僕射以何臬為尚書右僕射兼中書侍郎癸巳 皇帝幸東壁是日迎土牛以借春甲午 皇帝幸北壁大雨雪金人陷懷州守臣霍安國死之乙未 皇帝幸西壁丙申 皇帝幸南壁金人陷拱州丁酉赤氣亘天馮澥尚書左丞黏罕兵薄南壁王宗濬下城與金人戰敗績庚子 皇帝幸東壁張叔夜僉書樞密院事金人攻宣化門壬寅 皇帝幸北壁癸卯耳聃昌至絳州遇害甲辰大雪金人陷亳州丙午大雪金人為鵝車以攻城己酉命 皇弟康王為兵馬大元帥辛亥金人來議和要親王出盟壬子遣曹輔馮澥及宗室仲溫士諱使于虜營癸丑仲溫士諱還甲寅至丙辰大風雪不止金人陷京師 上曰朕不用种師道言以至於此初虜騎之去

也師道常勸上半度擊之不然異日必為後患至是果然金人遣蕭慶等四人來要 皇帝會盟又欲請 道君皇太子越王鄆王為質 上曰朕為人子豈可以 父為質哉丁巳 道君 皇帝入居延福宮金人盡得四壁遣李若水再使虜營金人招宰相議事乃遣何臬及濟王相杲榭回同金人四人來議和自乙卯雪大作盈三尺不止天地晦冥雪霽彗星竟天己未何臬再往軍前 詔曰大金堅欲 道君出郊朕以 宗廟生靈之故義當親往咨尔眾庶無致驚疑庚申旦日赤如火辛酉 皇帝出郊入虜營十二月壬戌朔 皇弟康王開兵馬大元帥府于相州癸亥 皇帝還宮甲子金人來索金一十萬鈔銀二千萬鈔縑帛如銀之數以犒軍乙丑 詔曰元祐皇后逮事宣仁聖烈皇后 欽聖憲肅皇后又曾經送 哲宗皇帝山陵

元符之末 欽聖憲肅皇后垂簾曾降指揮復冊命為 元祐
皇后可檢會恭依元降指揮仍尊為 元祐皇后以順天下之
意丙寅遣陳過庭劉鞫折彥文往河北河東割地金人拘過庭
于軍前丁卯金人來索軍器乙亥 皇弟康王如大名府是夜
京師火癸未 詔曰風雪大寒小民闕乏凍餒皆朕不德所致
其艮山竹木許任便樵採庚寅 皇弟康王如東平府金人犯
蔡州

二年春正月庚子 皇帝再出郊入虜營丙午劉鞫死于虜營
二月丙寅吳玠莫儔自虜營持文書令依金主詔推薦異姓堪
為人主者從軍前備禮冊命仍邀 道君皇帝出城丁卯 道
君皇帝 道君皇后同出郊鄆王楷以下諸王妃公主都尉皆
從燕王越王亦出辛未 皇后皇太子同出郊壬申孫傅張叔

夜往軍前戊寅虜歸張邦昌庚辰 康王如濟州金人無禮於
我李若水死之乙酉金人以金銀不足殺梅執禮程振陳知質
安扶三月辛卯朔張邦昌入京師丙申吳革謀起義不克死之
丁酉金人立張邦昌國號大楚宗澤與金人戰于長垣敗之庚
子金人來取宗室甲辰金人入內藏庫乙卯馮澥曹輔路允迪
等還何桌孫傅張叔夜秦檜司馬朴以廢立異議令舉家北遷
丁巳 道君皇帝北狩夏四月庚申朔 皇帝北狩金人退師
遂取河東河北地辛酉 康王以檄書告諭四方壬戌邦昌迎
元祐皇后入居延福宮號 宋太后癸亥羣臣勸進于 康王甲
子邦昌以書至 大元帥府丁卯謝克家以邦昌之命齎玉璽
至 大元帥府戊辰邦昌請 元祐皇后垂簾聽政庚午邦昌
復辟癸酉在京文武百官勸進于 康王乙亥以路允迪為奉

請車駕進發使范宗尹副之康王自汴州由金鄉單父以
至南京癸未駐軍府治甲申張邦昌至南京伏地慟哭請死
王尉撫之戊子元祐皇后遣使齎手書于南京五月庚寅朔
康王即皇帝位于南京遙上尊號曰孝慈淵聖皇帝紹興三
十一年金國使來言皇帝去冬崩聖壽六十一七月癸未謚
曰恭文順德仁孝皇帝廟號欽宗
臣稱曰自吾有狄難而欽宗適丁斯時天下之勢岌岌矣
欽宗乃當寧興歎思得賢佐以張國威而朝無君子終敗乃事
蓋百六之會難追也然民之戴宋有死無二此仁聖所以
中興于南都云

東都事略卷第十二

